

**Егемен Қазақстан**

**Егемен.kz**

**Мәңгілік Елдің Елордасы**



Астанаға – он бес жыл! Иә... он бес жыл! Апыр-ау, бұл не қылған он бес жыл?! Сенгің-ақ келмейді! Өйткені, көңілдегі де, көкейдегі де, көз алдымыздағы да Астана қаласы тап бір бұрыннан бар, мәңгілік орнап баяғыдан тұрған қала сияқты жүрек түкпірінде құтты бір қуаныш болып жатқандай көрінеді!

Тәуелсіз ел болып қалыптасқан екі он жылдықтың аралығында, дәл осы бір он бес жылда көк күмбезінің ұшар басында Көк байрағы асқақ желбіреп тұрған дәл мынандай Ақордалы Астана салып алу мүмкін бе еді? Мүмкін болмаса да, Қазақ елінің елордасы, астанасы салынды! Әлемде Қазақ елінің Астанасы бар! Сол бүгінгі Астана қаласы өзінің таңғажайып кескін-келбетімен де, әрленген сәнімен де қазір дүние әлемін таңдандырып та, тамсандырып та отырғандығы ақиқат!

Адал көңіл алаң түкпірінде жатқан осы бір ойды жалғар ендігі сөзді Елбасының Қазақстан халқына Жолдауында айтылған «Біз болашаққа көз тігіп, елімізді «Мәңгілік Ел» етуді мұрат қылдық», деген кемел сөзімен бастағанды жөн санадық. Өйткені, бұл сөзді Елбасының өткен, яғни 2012 жылдың 14 желтоқсаны күнгі «Қазақстан-2050» Стратегиясы – қалыптасқан мемлекеттің жаңа саяси бағыты» атты Жолдауында айтқанынан ғана естігеніміз болса да, Нұрсұлтан Назарбаевтың ел басқарудың «екі тізгін, бір шылбырын» өз қолына алған кезеңдерден бері Мәңгілік Ел болу мұратын біздің алдымызға бір бүгін ғана қойып отыр ма еді деген тағы бір ойдың сана түкпірінен үн қатары бар.

Шұғылалы көгілдір көк аспанға қалықтап ұшып бара жатқан қыран құстың қанатымен желпінген және де тәуелсіздіктің Көкбайрағын батыр бабаларымыздың найзасының ұшымен өз қолымен көтерген сол бір қайырлы да құтты сәттен бастап Қазақстан Республикасының Тұңғыш Президенті Нұрсұлтан Әбішұлы Назарбаевтың күні бүгінге дейін айтып та, жасап та келе жатқан әр істерімен қадамдары Қазақ елін әу бастан-ақ Мәңгілік Ел етуді тереңінен тербеп, әріден болжап ойлағандығы емес пе еді?! Иә, солай болатын! Ақиқаты да осы!

Тәуелсіздіктің баянды тағдыры Нұрсұлтан Назарбаевтың тағдыры, ал Елбасының тағдыры тұтас бір халықтың, барша қазақстандықтардың тағдыры болып қалыптасты да, Мәңгілік Елдің іргетасын Назарбаев өзінің кемел ойымен, ақыл мен сана түйсігіндегі көрегендігімен, тәуекелшіл ерлігімен тұрғызып бере алғандығын және де тұрғызып қана қоймай, сол Мәңгілік Елдің Астанасы көрікті, іргесі берік, еңсесі биік, бірлігі мызғымас, ынтымағы арзымас, ырысы таусылмас, берекесі кетпес, ырыздығы ортаймас, дәулеті шайқалмас, әлем алдындағы жүзі жарқын, сөзі өтімді, айбыны асқақ болсын деген перзенттік те президенттік те, адал ойымен бардан жоқты құрап дегендей бәрін де жасады, жасап та кележатыр. Көңіл осылай дейді!

Астана – қасиетті қазақ жеріне жүрегіне сыйған тұтас әлемді өз елі мен халқына деген шексіз сүйіспеншілігінің белгісіндей етіп өз даласына қондырып, орнықтыра білген Нұрсұлтан Назарбаевтың өзіндік бір әлемі!

Желмаямен желіп жүріп жер ұйығын іздеген Асанқайғы бабасындай тәуелсіз елі үшін ендігі жер ұйығын іздеген Нұрсұлтан Назарбаев Есілдің бойына ел қондырып, алғашқы қазығынан бастап өзі қағып, бүгінгі айдынды да айбынды Ақордалы Астананы дүниеге әкелгендігі біздің, яғни Қазақ елінің Мәңгілік Ел бола алатындығын дәлелдеп, осыған ең әуелі өз жұртының да, одан қалды дүние жұртының да көздерін жеткізіп, иландыра білген ұлылығы еді.

«Енді келіп, ХХІ ғасырдағы Қазақ елін және ата-бабаларымыз үшін ғасырлар бойы арман болған тәуелсіздігімізді бүгінгі Астанасыз көз алдыңызға елестетіп бір байқаңызшы! Аузыңыздың дәмі кірмес еді! Бұл Астана тәуелсіздігінің лүп-лүп соғып тұрған жүрегі емес пе?!

Бұл Астана халқымыздың барлық ұлы мұраттарының Бәйтерек болып тереңге тартқан тамыры, жайқалған жапырағы емес пе?! Бұл Астана дөңгеленген дүниенің қазақ иеленіп отырған қасиетті бір жеріне орнатылған әлемнің төрт бұрышынан да көзге түсіп көрінер, алтын тұғырлы ең заңғар да ең биік, ең абзал да, ең бір азбайтын да тозбайтын

мәңгілігі жолында мың өліп, мың тірілген қазақ үшін соғылған ұлы Ескерткіш! Сол ұлы да қасиетті, киелі Ескерткішті қазақ халқы үшін тұрғызып берген Елбасы Нұрсұлтан Назарбаевты өз халқының алдындағы перзенттік те президенттік парызына әмәнда адал болып келе жатқандығын және де өз халқы үшін небір көзсіз ерлікке бара алатын, батыл да батыр бола алатын текті де бір айрықша дара да дана қасиетін айғақтап тұр», дегенді бұдан бұрын айтқан да, жазған да болатынбыз («Әлемді жүрегіне сыйғызған» кітабы, авторы осы жолдардың иесі, 2012 жыл).

Ғасырлар бойғы бодандық пен социалистік лагерьдегі коммунизм елесімен өмір сүрген сұрқия кезеңдердің саясаты бізді құрансыз да ұрансыз өмір сүруге мәжбүрледі. Ұлттық сананы өшіріп тастау үшін өткенімізге өзімізге күл шашқызды, тарихымызды өзімізге отқа жаққызды, өзімізді өзімізден безіндірді. Сөйтіп, қазақ болып туғаны үшін намыстанып, өзін өзгелерден қор санайтын ұрпақ келді дүниеге. Өзінің туған халқы үшін тарихтың осы бір қиянатшыл ақиқатын білген және дежан-дүниесімен, сұңғыла көкейімен сезінетін Елбасы «Егер біз мемлекет болып тұрғымыз келсе, өзіміздің мемлекеттілігімізді ұзақ уақытқа меңзеп құрғымыз келсе, онда халықтың руханиятының бастауларын түсінгеніміз жөн», дегенді айта отырып, халқымыздың әріде, тым әріде және де тереңде жатқан тарих тамырымен бүгінгі және келер ұрпақтың бойына нәр таратты.

Мәңгілік Ел болудың ізгі ой-мүддесін әуелі ата-бабалар ерлігінен іздеу керек деген қағиданы алға тарта отырып, қазақ даласының кендігі мен теңдігі үшін және де ұлым күл, қызым күң болмасын, ұрпағым өссін деген ниетпен ат үстінде ұйықтап, ел іргесін бірде тасадан, бірде тосыннан, біресе қасқайып келіп қарсы шабар не бір жаудан қорғай білген сол бабалар көтерген ерлік пен елдіктің Көкбайрағын өз қолында қасиеттеп ұстап келе жатқан Елбасы «Біз бүгінгі бейбіт тірлігіміз үшін, Қазақстан деп аталатын Республиканың жер бетінде барлығы үшін тарихтың әр тұсында осы елді, осы жерді қорғаған қайсар жандардың аруағының алдында қашан да қарыздармыз», деп осы бір ақиқатқа адалжанымен жүгінді. Сөйтті де, тарихқа тағзым етті, батырларымызға құрмет көрсетті, аруақтарға мінәжат етіп, ас берді, құрбандық шалды.

Қазақтың күйзелісті кезеңдерінің бірінде орыс патшасының өктемдігіне шыдай алмай жан ашуымен кезінде өзі шапқан Ақмола бекінісін, бүгінгі тәуелсіз еліміздің Астана қаласын қақжарып, есіле ағып жатқан Есіл өзенінің жағасындағы елорда Астана қаласына арманы орындалып, өзінің бүгінгі ұрпақтарының дәуірлі жеңісімен көңілі өскен асқақ бір мереймен екпіндете желе шауып кіріп келе жатқан хан Кененің ескерткішін тұрғызған сәтте Елбасы «кесілген басың жаттың қолында қалса да, айбының асып, рухың ел төрінде, елордасында тұрсын» дегенді де ойлаған болар.

Сонау тәуелсіздік кезеңдерінің алғашқы жылдарынан бастап ел-елде, жержерде батырлар мен бабалар тойының көбейіп кетуінің сыры, міне, осы бір ел мәңгілігі бабалар ерлігі мен арманмүддесінде жатқандығынан іздесек етті деген Елбасының ойымен жүзеге асты да, талай бір батыр да қасиетті бабаларға кесенелер тұрғызылды, ескерткіштер соғылды. Хан ордасы Көкшетаудағы Абылайдың, Тараздағы Бәйдібек бабаның, Ақтөбедегі Әбілқайырдың, Атыраудағы Исатай мен Махамбеттің, Қостанайдағы Ахмет Байтұрсыновтың, Қызылжардағы Қарасаймен Ағынтайдың, ақын Мағжанның, Қызылордадағы Қобыланды мен Бұхарбай батырдың, Қарағандыдағы Қаз дауысты Қазыбек бидің ескерткіштері! Міне, бұлар бізге мәңгіліктен жеткен рухымыз!

Халықтың ерлік рухы мен ел тәуелсіздігінің жиырма жылдан астам уақыт аралығындағы Елбасының Мәңгілік Ел болу идеясымен ұштасып жатқан бүгінгі тарихи сабақтастыққа көз жіберіп, ой тоқтатар болсақ, бәрін де өзжадында қалт жібермей ұстай білетін көне тарихтың осы бір қас-қағымдық сәттеріндегі оқиғалар бізді тағы да мына бір жайға иландырғандай болады.

XX ғасырдың сонау тоқсаныншы жылдарының тоқырауынан теңдік алуға ұласқан мемлекеттердің кез келгенінің тағдыры таразыға тартылып еді. Біздің еліміздің де осыбір кезеңде тарих аранына жұтылып кете жаздап құтылған, теңселіп барып, еңсемізді тіктеген сәттеріміз де аз емес еді. Тоқсаныншы жылдардың жоқшылығы мен шарасыздығынан

ширығып, тұрмысының да қиюықашып, соның дауы көбейіп, қазақ баласы өз басына тағы да бір төніп келген XVII ғасырдың «ақтабан шұбырынды, алқакөл сұламасынан» аман қалды. Аман алып қалған Елбасы болатын!

Адам баласы жаралғалы өзі жайының жақсы боларлығы мен жайлы қыларлығын ойлап-ақ келе жатыр. Сол үшін жаратылыстың тылсым сырына құлақ түріп, аспандағы жұлдыздар әлеміне көз тікті. Сол жаратылыстың құпия қойнауын да қазбалап-ақ келеді. Әлі де сол! Тіпті адам баласының осы тылсымдықтың сырын білмектегі ынтықтығы мен құштарлығының күшті болғандығы соншалықты, ол аспандағы айға да аяқ басты. Әлі де әріге кетуменжетудің амалдарын іздестіріп, бір кездері қиял болған жайлардың өздерін қолға түсіріп, уысында ұстап отырғандығыда анықжай. Бұл, бәлкім, мәңгілік тіршілік іздеудің де бір әрекеті болар!

Жер мәңгілік болар, ел болса! Ел мәңгілік жасар, ер болса! Ер мәңгілік жасар, ел болса! Міне, мәңгіліктің бар тұтастығы осыған келіп саяры да бар. Алайда, осы мәңгіліктерді баянды ету жолындағы алғашқы қадамдар Елбасы үшін оңайға түсті ме? Әрине, оңайға соқпады! Соған қарамастан, Қазақстанның өзіндік даму жолын қалыптастырды. Әлемдік қоғамдастықта сенім мен құрметке ие болудың амалдарын жасады. Семей атом сынақ полигонын жауып, жарылыстан көз аспаған Ұлы Даланың көз жасын құрғатты. Ел шеті мен жер шегіне ешкімнің көз алартпауын аңдады, шекараның қауіпсіздігін қамдады. Сан ұлт өкілдерінен құралған елдің бірлігі мен ынтымағын ойлады. Тағдыры да, тарихы да бірігіп, ортақтасып қалыптасып кеткен кешегі кеңес халқы бір-бірінен көз жазып қалмаса екен, адами қарым-қатынастары суымаса екен деген ниетпен Еуразия одағы жайлы ой салып, соның қиын соқпақты жолын тартты. Есілдің бойына ел қондырып, дүниенің төрт бұрышына есігі айқара ашылған «Мәңгілік Ел» қақпасы бар Қазақ елінің Астанасын салды!

Астана өзінің он бес жылдық тарихында жалпы Адамзаттың мәңгілік мүдделерін шешу үшін бас қосар, сөйтіп, әлемнің өркениеттер мен түрлі көзқарастарын жақындастырушы, Жер шарының тіршілігі үшін барлық мемлекеттер мен саясаткерлердің ортақ жауапкершіліктері бар екендігін айта білген, айтып та келе жатқан ізгілікті ойлар мен батыл бастамашы қалаға айналды.

Дүние мынау толқып тұрған! Әлем мазасыз. Телегей теңіздей асып-тасып, булығып, қайнап жатқан мына дүниенің де, амалы қалмай алаң күй кешіп жатқан бүгінгі тіршілігіңіз де жан алыс та жан берістің жайын кешіп отырған бүгінгі заманның сиқын көріп, көңіліңді бір үрейдің билейтіндігі де анық. Абай хакім айтқан «Заманды адам билемек» деген қағида шын болса, бүгінгінің адамы сол өз заманына иелік ете алмай отыр ма деген де бір мазан ойдың шырмауында қаларың тағы да бар. Талайдан бері тыншымай отырған Таяу Шығыс дейсіз бе, сондағы «араб көктемі» деп басталған берекесіздік пен Сириядағы бітісе алмай жатқан қақтығыстар, кешелері бір аралға иелік үшін қару-жарағын сайлап, бірбіріне қыр көрсете бастаған жапондар мен қытайлықтар арасындағы дұрдараздық, екі кәріс мемлекеттері арасындағы қырғи қабақтық, ескі дүние әлемі Америка мен Еуропаны жайлап бара жатқан дағдарыс, соған қарсы халық наразылығы және де бауырлас ел Түркиядағы бүлікшілдік деген сияқты заманның бүгінгі көрінісі дүниенің ендігі дамуына жаңаша бір көзқарасты қажет ететін сыңайлы.

Ендігі арада бұған дейін айтылған да, жазылған да «марксшіл» талай бір пәлсапалардың да, небір ғылыми тұжырымдардың да ендігі дүниенің тұрпатына тұтқа бола алмасы да анық. Біз әлем және дүние қажетсініп отырған осы жаңа көзқарасты Қазақстан Президенті Нұрсұлтан Назарбаевтың әр бастамашы қадамынан байқап отырмыз. «Тарих адамзаттың әрбір жаңа дәуірінің алдына кең ауқымды міндеттер қояды. Бүгін ең маңызды мәселе ХХІ ғасырдағы жаһандық трансформация қиындықтарынан лайықты өту. Барлық ұлттардың арасындағы сенім мен бірлік – әлемнің әділдікпен жаңадан құрылуының негізі», деген ой айта келіп, Қазақстан Президенті тұтас әлемнің бүгінгі халіне көз жүгірте отырып, өзінің кемелді ойымен, парасатты пайым

бастамашылдығымен жаһандық дағдарыстан шығу жолдарын іздестіру үшін әлем ойшылдарын да топтастыра алды.

Астана биылғы жылдың 24 мамыры күні VI Астана экономикалық форумының аясында Бүкіл әлемдік дағдарысқа қарсы конференция өткізді. Біріккен Ұлттар Ұйымының қолдауымен тұңғыш рет өткізіліп отырған Бүкіл әлемдік дағдарысқа қарсы бұл конференцияға әлемнің 132 мемлекетінен келген 11 мыңға жуық саясаткерлер, сарапшылар және іс басындағы мамандар әлемдік экономиканың жаһандық дағдарыстан шығу жолдарын талқылады. Осы конференцияның пленарлық отырысының модераторы, «Euronews» телеарнасы Вашингтон бюросының тілшісі Стефан Гробенің сөзімен айтқанда, бұл жолы да Қазақ елінің Астанасы мен Қазақ елінің Президенті Нұрсұлтан Назарбаев ерке Есілдің жағасындағы осынау бір әсем де сәулетті қалада алтыншы рет әлемнің ең озық ақыл-ой өкілдері мен саясаткерлерінің, экономистері мен сарапшыларының жаһандық маңызды үнқатысу алаңында бастарын қосып, бүгінгі жаһандық экономиканы тұқыртып отырған әлемдік дағдарысты тығырықтан шығу жолдарын іздестірді, тың ойлар мен жаңа көзқарастардың қалыптасуына ықпал жасады.

Әлемнің қазіргі жаһандануы мен түйісуінің түйіндерінен туындатып отырған жаһандық өзекті мәселелерге бейжай қарай алмайтын сол әлемнің бүгінгі ұлы ойшылдары тағы да реформатор Нұрсұлтан Назарбаевтың «G-Global» бастамасының жаһандық дағдарыстың себеп-салдарларын бірлесе іздестірудегі өлшеусіз рөліне тоқталды. Бұл бүкіл әлемнің Назарбаевқа берген әділ бағасы болатын! Көңіл осылай деп қабылдады.

Дүние жүзінің ғұлама ғалымдары – Нобель сыйлығының лауреаттары біздің Астанада өз клубтарын құрды! Сонымен бірге, Нұрсұлтан Назарбаевтың «G-Global»-ының интернеттегі коммуникативті алаңының қызметі Астана форумын үздіксіз онлайн талқылауының орталығына айналдырды! Бұл Астана форумының маңызы арта түскендігін және де Назарбаев ұсынған «G-Global» атты XXI ғасырдың жаңа әлемдік құрылымы идеясының аймақтық қана емес, жаһандық сұранысқа ие бола бастағандығы емес пе?!

– Жаһандық дағдарысқа қарсы күрес жоспарын белгілеу үдерісі барысында соңғы жылдары өзіміз бетпе-бет келген бірқатар маңызды сабақтарды ой елегінен өткізуіміз керек. Өздеріңіз ойлап қараңыздаршы, өткен жылдың соңында бүкіләлем XXI ғасырдың жаһанданған экономикасының бірінші дағдарысы тарих қойнауына кеткеніне сенгендей де еді. Бұл туралы бізді көптеген қаржы институттары барынша сендіріп бақты. Алайда, әлемнің үкілі үміті ақталмады. Кипрдегі қаржы жүйесінің күйреуі бүкіләлемдік экономикалық тұрақтылық дәуірінің ауылы алыс екенін көрсетті, – деп Елбасы «бұл ең алдымен қаржы көбіктерін жасанды түрде «үрлеу» және «жеңіл ақшаға» деген құмарлық, жаһандық қаржы жүйесін басқарудағы әлсіздік, ұлттық қаржы институттарының тиісті жауапкершілігінің жоқтығынан болып отыр» деген ақиқатты да ашық айтты.

Астана жер жаһанға XXI ғасырда әлемге жаңа экономикалық үлгінің қажеттілігін алға тартты!

Астана «адамзат өндірген өнімдер қоғамның әрбір мүшесінің гүлденуі және бақыты үшін жұмсалуды керек», деген дүниежұртыбұрын-сонды естіп көрмеген ой айтты!

Астана «жасыл» энергетикаға көшу және «жасыл» технологияны өндіріске енгізу – бұл жаһандық экономиканың дамушы векторы бола алатындығын мойындатты!

Астанада ұйымдастырылған жаһандық мәні бар осы ірі форумға қатысушы Біріккен Ұлттар Ұйымы Бас Ассамблеясы 67-ші сессиясының президенті Вук Еремичтің «Мұнда келгеннен кейін Астана қаласын, оның барынша сәнді де ғажайып ғимараттарын көріп таңданысқа бөлендім. Астана өзінің осындай адамзат қауымын ортақ үнқатысуға шақырған бастамаларымен нағыз бейбітшілік қаласына айналып келеді екен. Осы қалаға оның «Бәйтерек», «Қазақ елі», «Хан Шатыр» секілді сәнді ғимараттары мен ескерткіш монументтері керемет жарасымын тауып, өзінше бір мағына беріп тұрғандай. Иә, Астана бүгінгі күні адамзат прогресінің маңызды бөлігіне айналууда», дегенді айтуы бүгінгі

әлемнің Қазақ елінің Астанасына берген баға жеткізгісіз әділ пікірі мен орынды ойы деп қабылдануы керек!

Және де Грузия демократиялық қозғалысы партиясының төрайымы Нино Бурджанадзең «Қазақстанның әсем астанасын көріп, осында өтіпжатқан VI Астана экономикалық форумының жұмысына қатысып, үлкен ойға қалдым. Қазақстан өз тәуелсіздігіне ие болғаннан бері қатты дамып кеткен екен. Сіздер тәуелсіздіктің игіліктерін шын мәнінде тиімді пайдалана білген екенсіздер!», деген сөзіне сүйсіне отырып, «иә, біз Нұрсұлтан Назарбаевтай көреген де кемел ойлы Елбасының арқасында тәуелсіздіктің игіліктерін шын мәнінде тиімді пайдалана білген елміз!», деген сөзді бізден бұрын жат айтса да, соны асқақ үнмен қайра бір қайталағың-ақ келері бар!

Тарих ақиқатты сүйеді! Сол ақиқатқа жүгіне отырып, тәуелсіздігіміздің алғашқы бір кезеңдерінде, яғни 1997 жылы Нұрсұлтан Назарбаев жариялаған Қазақстанның 2030 жылға дейінгі Даму Стратегиясы сол біз айтып отырған Мәңгілік Ел болуды мұрат тұтқандығы екендігін енді ұғына бастағандығымызды айтайық. Әйтпесе, әлі де болса бағыт алған тәуелсіздік көшінің қайда барып тұрақтарын біле алмай отырған сонау бір қылталы тұста қалың ел болып «біз қайда, 2030 жыл қайда?!» деген күдікті бір оймен таңданысты жағдайда жүрер ме едік?! Енді, міне, сол күдік жоққа шығып, стратегияның ақиқатқа айналғандығына да куәміз! Осы орайда Елбасы өз Жолдауында «2030» Стратегиясында белгіленген негізгі міндеттер орындалды, қалғандары орындалу үстінде. Бүгінгі күні біздің әрқайсымыз «2030» Стратегиясы іске асты, заманауи Қазақстан орнықты», деп мәлімдеген де болатын.

Соңғы екі он жылдықта ғана әлемдік саяси картада пайда болған Қазақстан Республикасының 2012 жылы Бүкіләлемдік банктің «бизнесі жүргізу» рейтингі бойынша біздің еліміз 49-шы орынды иеленсе, «инвесторлардықорғау» көрсеткіші бойынша 10-шы орынға шықса, Бүкіләлемдік экономикалық форум белгілеген бәсекеге қабілеттілік рейтингі бойынша Қазақстан қазірдің өзінде 51-ші орынды иеленіп отыр. «Біз осыдан бірнеше жыл бұрын мен күн тәртібіне қойған еліміздің әлемдегі бәсекеге ең қабілеттілік 50 елдің қатарына кіру туралы міндетті орындауға жақын қалдық», деп Елбасының айтқаны біздің ісімізге қанат бітірері де сөзсіз.

Қазіргі Тәуелсіз Қазақстан өзінің жаңа саяси бағыты – «Қазақстан-2050» Стратегиясын белгілеп, ендігі арада әлемнің ең дамыған 30 елінің бірі болу мақсатын қойып отыр. Бұл жаңа саяси бағыт дамудың өскелең инновациялық экономикасы мен әлеуметтік қағидаттарға негізделіп, ол ең бастысы – «экономика – энергетика – экология» атты үш негізгі тұғырларды таяныш етпекші. Елбасы мұны «алыста сағым қуған елес емес, нақты адамзаттың жоғары сұраныстарына негізделген ақиқат», деп жалпы адамзат тіршілігінің ендігі көзі мен негізін нақтылы ойымен айқындап бере алды.

Адам баласының жер бетінде мәңгілік өмір сүруге хақы бар екендігін ұдайы айтып келе жатқан Назарбаев жер қойнауында қазба байлықтары, соның ішінде көмірсутегі кен орындарының жетіп артыларына да қарамастан, болашақта балама қуат көздерін дамытуды да адамзаттың алдына тартып отыр. Бұдан бұрын да Назарбаевтың әлемдік қауымдастықтың қолдауына ие болған Рио-де-Жанейро саммитінде ұсынған жаһандық энергия-экологиялық стратегиясы туралы бастамасымен «Жасыл көпір» жоспарының жүзеге асарына енді төрт жылдан кейін Астанада ЭКСПО-2017 Бүкіләлемдік көрмесінің «Болашақтың энергиясы» ұранымен өткізілетіндігі де сенімді нығайта түсері бар. Қазақстан және оның Президентінің енді келіп болашақтың энергиясын іздестіре бастауы және де соған әлемнің барлық ойшылдары мен ғалымдарының назарын аударуы Назарбаевтың жалпы адамзаттың мүддесіне қызмет етуі емес деп айта алар ма екенбіз?! Иә, бұл, яғни, «жасыл жаратқандыру» адамзат баласының алдағы мыңжылдықтардағы ғұмыры мен мәңгі жасауының тағдыры да болары анық. Елбасының мәңгілікке қызмет ету ісінің бір парасы, міне, осыған келіп саяды!

Астана және де Еуропа мен Азияның ұштасқан тұсында орналасқан Қазақстан жаңа ғасырдағы адамзат өркениетінің мүдделерін белгілеп, оны айқындай түсуде тағыда

көшбасшылық жасай білді. Бұл Назарбаевтың «адамзаттың бәрін сүй бауырым деп» деп Абай хакім айтқандай, мансаптық пендешілігінен ада жаны мен арының тазалығы мен адалдығы дер едік. Қазақстан Президенті Нұрсұлтан Назарбаев Мәскеу Мемлекеттік университетінде осыдан 20 жылдай бұрын Еуразия одағыидеясынортаға салса, бұған қаншама қарсыласып, мойынсұнғысы келмегендердің ырқына да қарамастан бұл идея ақыры өмір шындығына айналды, ол өзінің өмірлік маңыздылығын да айғақтап тұр! Бұдан кейін Біртұтас экономикалық кеңістік қалыптастыруға зор ықпалы тиген Ресей, Беларусь, Қазақстан елдерінің қатысуымен Кеден одағы құрылды. Міне, әлем қазіргі орын алып отырған жаһандық экономикалық дағдарыстан шығудың жаңа экономикалық әрі жаңа қаржылық жүйесін іздестіріп жатқан шақта Қазақстан Президенті осылайша болашақтың мүддесіне бір аттам батыл қадам жасады. Мәңгілік Елдің Астанасынан бастау алған адамзаттың тағы бір үмітті болашағы әлем кеңістігін шарлап кетті!

Бұл күндері Астана қаласының қасиетті қазақ жеріндегі аумағы ғана қанат жайып, ұлғайып бара жатқан жоқ, Астананың жер жаһандағы абыройы да, ізгілікті істері де ұлғайып, өсіп, дәуірлеп барады. Мәңгілік Елдің Астанасы солай болуы да керек қой!

Жабал ЕРҒАЛИЕВ

жазушы, Қазақстанның еңбек сіңірген қайраткері, Парламент Сенатының депутаты.